

四庫全書

子部

欽定四庫全書

說苑卷五

漢 劉向 撰

貴德

聖人之於天下百姓也其猶赤子乎飢者則食之寒者則衣之將之養之育之長之唯恐其不至於大也詩曰蔽芾甘棠勿翦勿伐召伯所茇傳曰自陝以東者周公主之自陝以西者召公主之召公述職當桑蠶之時不

欲變民事故不入邑中舍于甘棠之下而聽斷焉陝間之人皆得其所是故後世思而歌詠之善之故言之言之不足故嗟歎之嗟歎之不足故歌詠之夫詩思然後積積然後滿滿然後發發由其道而致其位焉百姓歎其美而致其敬甘棠之不伐也政教惡乎不行孔子曰吾於甘棠見宗廟之敬也甚尊其人必敬其位順安萬物古聖之道幾哉仁人之德教也誠惻隱於中惻怛於內不能已於其心故其治天下也如救溺人見天下強

陵弱衆暴寡幼孤羸露死傷係虜不忍其然是以孔子
歷七十二君冀道之一行而得施其德使民生於全育
烝庶安土萬物熙熙各樂其終卒不遇故睹麟而泣哀
道不行德澤不洽於是退作春秋明素王之道以示後
人恩施其惠未嘗輟忘是以百王尊之志士法焉誦其
文章傳今不絕德及之也詩曰載馳載驅周爰咨謀此
之謂也聖王布德施惠非求報於百姓也郊望禘嘗非
求報於鬼神也山致其高雲雨起焉水致其深蛟龍生

焉君子致其道德而福祿歸焉夫有陰德者必有陽報
有隱行者必有昭名古者溝防不修水為人害禹鑿龍
門闢伊闕平治水土使民得陸處百姓不親五品不遜
契教以君臣之義父子之親夫婦之辨長幼之序田野
不修民食不足后稷教之闢地墾草糞土樹穀令百姓
家給人足故三后之後無不王者有陰德也周室衰禮
義廢孔子以三代之道教導於後世繼嗣至今不絕者
有隱行也周頌曰豐年多黍多稌亦有高廩萬億及秭

為酒為醴烝畀祖妣以洽百禮降福孔偕禮記曰上牲
損則用下牲下牲損則祭不備物以其外之為不樂也
故聖人之於天下也譬猶一堂之上也今有滿堂飲酒
者有一人獨索然向隅而泣則一堂之人皆不樂矣聖
人之於天下也譬猶一堂之上也有一人不得其所者
則孝子不敢以其物薦進

魏武侯浮西河而下中流顧謂吳起曰美哉河山之固
也此魏國之寶也吳起對曰在德不在險昔三苗氏左

洞庭右彭蠡德義不修而禹滅之夏桀之居左河濟右太華伊闕在其南羊腸在其北修政不仁湯放之殷紂之國左孟門而右太行常山在其北太河經其南修政不德武王伐之由此觀之在德不在險若君不修德船中之人盡敵國也武侯曰善

武王克殷召太公而問曰將奈其士衆何太公對曰臣聞愛其人者兼屋上之烏憎其人者惡其餘胥咸劉厥敵使靡有餘何如王曰不可太公出邵公入王曰為之

奈何邵公對曰有罪者殺之無罪者活之何如王曰不
可邵公出周公入王曰為之奈何周公曰使各居其宅
田其田無變舊新唯仁是親百姓有過在予一人武王
曰廣大乎平天下矣凡所以貴士君子者以其仁而有
德也

孔子曰里仁為美擇不處仁焉得智夫仁者必恕然後
行行一不義殺一無罪雖以得高官大位仁者不為也
夫大仁者愛近以及遠及其有所不諧則虧小仁以就

大仁大仁者恩及四海小仁者止於妻子妻子者以其知營利以婦人之恩撫之飾其內情雕畫其偽孰知其非真雖當時蒙榮然士君子以為大辱故共工驩兜符里鄧析其智非無所識也然而為聖王所誅者以無德而苟利也豎刁易牙毀體殺子以干利卒為賊於齊故人臣不仁篡弑之亂生人臣而仁國治主榮明主察焉宗廟太寧夫人臣猶貴仁況於人主乎故桀紂以不仁失天下湯武以積德有海土是以聖王貴德而務行之

孟子曰推恩足以及四海不推恩不足以保妻子古人所以大過人者無他焉善推其所有而已

晏子飲景公酒令器必新家老曰財不足請斂於民晏子曰止夫樂者上下同之故天子與天下諸侯與境內自大夫以下各與其僚無有獨樂今上樂其樂下傷其費是獨樂者也不可

齊桓公北伐山戎氏其道過燕燕君逆而出境桓公問甯仲曰諸侯相逆固出境乎甯仲曰非天子不出境桓

公曰然則燕君畏而失禮也寡人不道而使燕君失禮
乃割燕君所至之地以與燕君諸侯聞之皆朝於齊詩
云靖恭爾位好是正直神之聽之介爾景福此之謂也
景公探爵殷殷弱故反之晏子聞之不待請而入見景
公汗出惕然晏子曰君胡為者也景公曰我探爵殷殷
弱故反之晏子逡巡北面再拜而賀之吾君有聖王之
道矣景公曰寡人探爵殷殷弱故反之其當聖王之道
者何也晏子對曰君探爵殷殷弱故反之是長幼也吾

君仁愛禽獸之加焉而況於人乎此聖王之道也

景公觀嬰兒有乞於途者公曰是無歸夫晏子對曰君存何為無歸使養之可立而以聞

景公遊於壽宮觀長年負薪而有飢色公悲之喟然歎曰令吏養之晏子曰臣聞之樂賢而哀不肖守國之本也今君愛老而恩無不逮治國之本也公笑有喜色晏子曰聖王見賢以樂見不肖以哀不肖今請求老弱之不養鰥寡之不室者論而供秩焉景公曰諾於是老弱

有養鰥寡有室

卷五

桓公之平陵見家人有年老而自養者公問其故對曰
吾有子九人家貧無以妻之吾使傭而未返也桓公取
外御者五人妻之筦仲入見曰君之施惠不亦小矣公
曰何也對曰公待所見而施惠焉則齊國之有妻者少
矣公曰若何筦仲曰令國丈夫三十而室女子十五而
嫁

孝宣皇帝初即位守廷尉吏路溫舒上書言尚德緩刑

其詞曰陛下初即至尊與天合符宜改前世之失正始
受之統滌煩文除民疾存亡繼絕以應天德天下幸甚
臣聞往者秦有十失其一尚存治獄更是也昔秦之時
滅文學好武勇賤仁義之士貴治獄之吏正言謂之誹
謗謁過謂之妖言故盛服先王不用於世忠良切言皆
鬱於胸譽諛之聲日滿於耳虛美薰心實禍蔽塞此乃
秦之所以亡天下也方今海內賴陛下厚恩無金革之
危飢寒之患父子夫婦戮力安家天下幸甚然太平之

未洽者獄亂之也夫獄天下之命死者不可生斷者不可屬書曰與其殺不辜寧失不經今治獄吏則不然上下相驅以刻為明深者獲公名平者多後患故治獄吏皆欲人死非憎人也自安之道在人之死是以死人之血流離於市被刑之徒比肩而立大辟之計歲以萬數此聖人所以傷太平之未洽凡以是也人情安則樂生痛則思死捶楚之下何求而不得故囚人不勝痛則飾誣詞以示之吏治者利其然則指道以明之上奏恐却

則鍛煉而周內之蓋奏當之成雖臯陶聽之猶以為死
有餘罪何則成鍊之者衆而文致之罪明也是以獄吏
專為深刻殘賊而無極偷為一切不顧國患此世之大
賊也故俗語云畫地作獄議不可入刻木為吏期不可
對此皆疾吏之風悲痛之辭也故天下之患莫深於獄
敗法亂政離親塞道莫甚於治獄之吏此臣所謂一尚
存也臣聞鳥鵲之卵不毀而後鳳皇集誹謗之罪不誅
而後良言進故傳曰山藪藏疾川澤納汚國君含垢天

之道也臣昧死上聞願陛下察誹謗聽切言開天下之口廣箴諫之路改亡秦之一失遵文武之嘉德省法制寬刑罰以廢煩獄則太平之風可興於世福履和樂與天地無極天下幸甚書奏皇帝善之後卒於臨淮太守晉平公春築臺叔向曰不可古者聖王貴德而務施緩刑辟而趨民時今春築臺是奪民時也夫德不施則民不歸刑不緩則百姓愁使不歸之民役愁怨之百姓而又奪其時是重竭也夫牧百姓養育之而重竭之豈所

以定命安存而稱為人君於後世哉平公曰善乃罷臺役

趙簡子春築臺於邯鄲天雨而不息謂左右曰可無趨種乎尹鐸對曰公事急厝種而懸之臺夫雖欲趨種不能得也簡子惕然乃釋臺罷役曰我以臺為急不如民之急也民以不為臺故知吾之愛也

中行獻子將伐鄭范文子曰不可得志於鄭諸侯讐我憂必滋長郤至又曰得鄭是兼國也兼國則王王者固

多憂乎文子曰王者盛其德而遠人歸故無憂今我寡德而有王者之功故多憂今子見無土而欲富者樂乎哉

季康子謂子游曰仁者愛人乎子游曰然人亦愛之乎子游曰然康子曰鄭子產死鄭人丈夫舍玦珮婦人舍珠珥夫婦巷哭三月不聞竽瑟之聲仲尼之死吾不聞魯國之愛夫子奚也子游曰譬子產之與夫子其猶浸水之與天雨乎浸水所及則生不及則死斯民之生也

必以時雨既以生莫愛其賜故曰譬子產之與夫子也
猶浸水之與天雨乎

中行穆子圍鼓鼓人有以城反者不許軍吏曰師徒不
勤可得城奚故不受曰有以吾城反者吾所甚惡也人
以城來我獨奚好焉賞所甚惡是失賞也若所好何若
不賞是失信也奚以示民鼓人又請降使人視之其民
尚有食也不聽鼓人告食盡力竭而後取之克鼓而反
不戮一人

孔子之楚有漁者獻魚甚強孔子不受獻魚者曰天暑
市遠賣之不售思欲棄之不若獻之君子孔子再拜受
使弟子掃除將祭之弟子曰夫人將棄之今吾將祭之
何也孔子曰吾聞之務施而不腐餘財者聖人也今受
聖人之賜可無祭乎

鄭伐宋宋人將與戰華元殺羊食士其御羊斟不與焉
及戰曰疇昔之羊羹子為政今日之事我為政與華元
馳入鄭師宋人敗績

楚王問莊辛曰君子之行奈何莊辛對曰居不為垣墻人莫能毀傷行不從周衛人莫能暴害此君子之行也楚王復問君子之富奈何對曰君子之富假貸人不德也不責也其食飲人不使也不役也親戚愛之衆人喜之不肖者事之皆欲其壽樂而不傷於惠此君子之富也楚王曰善

丞相西平侯于定國者東海下邳人也其父號曰于公為縣獄吏決曹掾決獄平法未嘗有所冤郡中離文法

者于公所決皆不敢隱情東海郡中為于公生立祠命
曰于公祠東海有孝婦無子少寡養其姑甚謹其姑欲
嫁之終不肯其姑告鄰之人曰孝婦養我甚謹我哀其
無子守寡日久我老累丁壯奈何其後母自經死母女
告吏曰孝婦殺我母吏捕孝婦孝婦辭不殺姑吏欲毒
治孝婦自誣服具獄以上府于公以為養姑十年以孝
聞此不殺姑也太守不聽數爭不能得於是于公辭疾
去吏太守竟殺孝婦郡中枯旱三年後太守至卜求其

故于公曰孝婦不當死前太守強殺之咎當在此於是殺牛祭孝婦冢太守以下自至焉天立大雨歲豐熟郡中以此益敬重于公于公築治廬舍謂匠人曰為我高門我治獄未嘗有所冤我後世必有興者令容高蓋駟馬車及子封為西平侯

孟簡子相梁并衛有罪而走齊甯仲迎而問之曰吾子相梁并衛之時門下使者幾何人矣孟簡子曰門下使者有三千餘人甯仲曰今與幾何人來對曰臣與三人

俱仲曰是何也對曰其一人父死無以葬我為葬之一人母死無以葬亦為葬之一人兄有獄我為出之是以得三人來筦仲上車曰嗟茲乎我窮必矣吾不能以春風風人吾不能以夏雨雨人吾窮必矣

凡人之性莫不欲善其德然而不能為善德者利敗之也故君子羞言利名言利名尚羞之况居而求利者也周天子使冢父毛伯求金於諸侯春秋譏之故天子好利則諸侯貪諸侯貪則大夫鄙大夫鄙則庶人盜上之

變下猶風之靡草也故為人君者明貴德而賤利以道
下下之為惡尚不可止今隱公貪利而身自漁濟上而
行八佾以此化於國人國人安得不解於義解於義而
縱其欲則災害起而臣下僻矣故其元年始書螟言災
將起國家將亂云爾

孫卿曰夫鬪者忘其身者也忘其親者也忘其君者也
行須臾之怒而鬪終身之禍然乃為之是忘其身也家
室離散親戚被戮然乃為之是忘其親也君上之所致

惡刑法之所大禁也然乃犯之是忘其君也今禽獸猶知近父母不忘其親也人而忘其身內忘其親上忘其君是不若禽獸之仁也凡鬪者皆自以為是而以他人為非已誠是也人誠非也則是已君子而彼小人也夫以君子而與小人相賊害是人之所謂以狐白補犬羊身塗其炭豈不過甚矣哉以為智乎則愚莫大焉以為利乎則害莫大焉以為榮乎則辱莫大焉人之有鬪何哉比之狂惑疾病乎則不可面目人也而好惡多同人

之鬪誠愚惑失道者也詩云式號式呼俾晝作夜言鬪行也

子路持劍孔子問曰由安用此乎子路曰善古者固以善之不善古者固以自衛孔子曰君子以忠為質以仁為衛不出環堵之內而聞千里之外不善以忠化寇暴以仁圍何必持劍乎子路曰由也請攝齊以事先生矣樂羊為魏將以攻中山其子在中山中山懸其子示樂羊樂羊不為衰志攻之愈急中山因烹其子而遺之樂

羊食之盡一杯中山見其誠也不忍與其戰果下之遂
為魏文侯開地文侯賞其功而疑其心孟孫獵得麇使
秦西巴持歸其母隨而鳴西巴不忍縱而與之孟孫怒
而逐秦西巴居一年召以為太子傅左右曰夫秦西巴
有罪於君今以為太子傅何也孟孫曰夫以一麇而不
忍又將能忍吾子乎故曰巧詐不如拙誠樂羊以有功
而見疑秦西巴以有罪而益信由仁與不仁也

智伯還自衛三卿燕于藍臺智襄子戲韓康子而侮段

規智果聞之諫曰主弗備難難必至曰難將由我我不
為難誰敢興之對曰異於是夫郤氏有車轅之難趙有
孟姬之讒藥有叔祁之訴范中行有函冶之難皆主之
所知也夏書有之曰一人三失怨豈在明不見是圖周
書有之曰怨不在大亦不在小夫君子能勤小物故無
大患今主一謀而媿人君相又弗備曰不敢興難毋乃
不可乎嘻不可不懼蚋蟻蜂蠆皆能害人況君相乎不
聽自是五年而有晉陽之難段規反而殺智伯于師遂

滅智氏

智襄子為室美士茁夕焉智伯曰室美矣夫對曰美則美矣抑臣亦有懼也智伯曰何懼對曰臣以秉筆事君記有之曰高山浚源不生草木松柏之地其土不肥今土木勝臣懼其不安人也室成三年而智氏亡

說苑卷五

欽定四庫全書

子部
說苑卷六
七

詳校官侍讀學士臣沈威猷

編修臣程嘉謨覆勘

總校官檢討臣何思鈞

校對官編修臣參晉

騰錄監生臣陸麟

欽定四庫全書

說苑卷六

復恩

漢 劉向 撰

孔子曰德不孤必有鄰夫施德者貴不德受恩者尚必報是故臣勞勤以為君而不求其賞君持施以收下而無所德故易曰勞而不伐有功而不德厚之至也君臣相與以市道接君懸祿以待之臣竭力以報之逮臣有

不測之功則主加之以重賞如主有超異之恩則臣必死以復之孔子曰北方有獸其名曰歷前足鼠後足兔是獸也甚矣其愛蛭蛭巨虛也食得甘草必齧以遺蛭蛭巨虛蛭蛭巨虛見人將來必負歷以走歷非性之愛蛭蛭巨虛也為其假足之故也二獸者亦非性之愛歷也為其得甘草而遺之故也夫禽獸昆蟲猶知比假而相報也況於士君子之欲興名利於天下者乎夫臣不復君之恩而苟營其私門禍之原也君不能報臣之

功而憚刑賞者亦亂之基也夫禍亂之原基由不報恩生矣

趙襄子見圍於晉陽罷圍賞有功之臣五人高赫無功而受上賞五人皆怒張孟談謂襄子曰晉陽之中赫無大功今與之上賞何也襄子曰吾在拘厄之中不失臣主之禮唯赫也子雖有功皆驕寡人與赫上賞不亦宜乎仲尼聞之曰趙襄子可謂善賞士乎賞一人而天下之人臣莫敢失君臣之禮矣

晉文公亡時陶叔狐從文公反國行三賞而不及陶叔
狐陶叔狐見咎犯曰吾從君而亡十有三年顏色黧黑
手足胼胝今君反國行三賞而不及我也意者君忘我
與我有大故與子試為我言之君咎犯言之文公文公
曰嘻我豈忘是子哉夫高明至賢德行全誠眈我道
說我以仁暴浣我行昭明我名使我為成人者吾以為
上賞防我以禮諫我以誼蕃援我使我不得為非數引
我而請於賢人之門吾以為次賞夫勇壯強禦難在前

則居前難在後則居後免我於患難之中者吾又以為
之次且子獨不聞乎死人者不如存人之身亡人者不
如存人之國三行賞之後而勞苦之士次之夫勞苦之
士是子固為首矣豈敢忘子哉周內史叔興聞之曰文
公其霸乎昔聖王先德而後力文公其當之矣詩云率
履不越此之謂也

晉文公入國至於河令棄籩豆茵席顏色黎黑手足胼
胝者在後咎犯聞之中夜而哭文公曰吾亡也十有九

年矣今將反國夫子不喜而哭何也其不欲吾反國乎
對曰籩豆茵席所以官者也而棄之顏色黎黑手足胼
胝所以執勞苦而皆後之臣聞國君蔽士無所取忠臣
大夫蔽遊無所取忠友今至於國臣在所蔽之中矣不
勝其哀故哭也文公曰禍福利害不與咎氏同之者有
如白水祝之乃沈璧而盟介子推曰獻公之子九人唯
君在耳天未絕晉必將有主主晉祀者非君而何唯二
三子者以為已力不亦誣乎文公即位賞不及推推母

謂曰盍亦求之推曰尤而效之罪又甚焉且出怨言不食其食其母曰亦使知之推曰言身之文也身將隱安用文其母曰能如是與若俱隱至死不復見推從者憐之乃懸書宮門曰有龍矯矯頃失其所五蛇從之周徧天下龍饑無食一蛇割股龍反其淵安其壤土四蛇入穴皆有處所一蛇無穴號於中野文公出見書曰嗟此介子推也吾方憂王室未圖其功使人召之則亡遂求其所在聞其入綿上山中於是文公表綿上山中而封

之以為介推田號曰介山

晉文公出亡周流天下舟之僑去虞而從焉文公反國
擇可爵而爵之擇可祿而祿之舟之僑獨不與焉文公
酌諸大夫酒酒酣文公曰二三子盍為寡人賦乎舟之
僑進曰君子為賦小人請陳其辭曰有龍矯矯頃失其
所一蛇從之周流天下龍反其淵安寧其處一蛇鬻乾
獨不得其所文公瞿然曰子欲爵耶請待旦日之期子
欲祿耶請令命廩人舟之僑曰請而得其賞廩者不受

也言盡而名至仁者不為也今天油然作雲沛然下雨則苗草興起莫之能禦今為一人言施一人猶為一塊土下雨也土亦不生之矣遂歷階而去文公求之不得終身誦甫田之詩

邴吉有陰德於孝宣皇帝徵時孝宣皇帝即位衆莫知吉亦不言吉從大將軍長史轉遷至御史大夫宣帝聞之將封之會吉病甚將使人加紳而封之及其生也太子太傅夏侯勝曰此未死也臣聞之有陰德者必饗

其樂以及其子孫今此未獲其樂而病甚非其死病也
後病果愈封為博陽侯終饗其樂

魏文侯攻中山樂羊將已得中山還反報文侯有喜功
之色文侯命主書曰羣臣賓客所獻書操以進主書者
舉兩篋以進令將軍視之盡難攻中山之事也將軍還
走北面而再拜曰中山之舉也非臣之力君之功也

平原君既歸趙楚使春申君將兵救趙魏信陵君亦矯
奪晉鄙軍往救趙未至秦急圍邯鄲邯鄲急且降平原

君患之邯鄲傳舍吏子李談謂平原君曰君不憂趙亡乎平原君曰趙亡即勝虜何為不憂李談曰邯鄲之民炊骨易子而食之可謂至困而君之後宮百數婦妾荷紆綬厨餘粱肉士民兵盡或剡木為矛戟而君之器物鐘磬自恣若使秦破趙君安得有此使趙而全君何患無有君誠能令夫人以下編於士卒間分功而作之家所有盡散以饗食士方其危苦時易為惠耳於是平原君如其計而勇敢之士三千人皆出死因從李談赴秦軍秦軍為

却三十里亦會楚魏救至秦軍遂罷李談死封其父為孝侯
秦繆公嘗出而亡其駿馬自往求之見人已殺其馬方
共食其肉繆公謂曰是吾駿馬也諸人皆懼而起繆公
曰吾聞食駿馬肉不飲酒者殺人即以次飲之酒殺馬
者皆慙而去居三年晉攻秦繆公圍之往時食馬肉者
相謂曰可以出死報食馬得酒之恩矣遂潰圍繆公卒
得以解難勝晉獲惠公以歸此德出而福反也

楚莊王賜羣臣酒日暮酒酣燈燭滅乃有人引美人之

衣者美人援絕其冠纓告王曰今者燭滅有引妾衣者
妾援得其冠纓持之趣火來上視絕纓者王曰賜人酒
使醉失禮奈何欲顯婦人之節而辱士乎乃命左右曰
今日與寡人飲不絕冠纓者不歡羣臣百有餘人皆絕
去其冠纓而上火卒盡懼而罷居三年晉與楚戰有一
臣常在前五合五奮首却敵卒得勝之莊王怪而問曰
寡人德薄又未嘗異子子何故出死不疑如是對曰臣
當死往者醉失禮王隱忍不加誅也臣終不敢以蔭蔽

之德而不顯報王也嘗願肝腦塗地用頸血濺敵久矣
臣乃夜絕纓者也遂敗晉軍楚得以強此有陰德者必
有陽報也

趙宣孟將上之絳見翳桑下有卧餓人不能動宣孟止
車為之下食自含而饋之餓人再咽而能視宣孟問爾
何為饑若此對曰臣居於絳歸而糧絕羞行乞而憎自
致以故至若此宣孟與之壺飧脯二胸再拜頓首受之
不敢食問其故對曰向者食之而美臣有老母將以貢

之宣孟曰子斯食之吾更與汝乃復為之簞食以脯二
束與錢百去之絳居三年晉靈公欲殺宣孟置伏士於
房中召宣孟而飲之酒宣孟知之中飲而出靈公命房
中士疾追殺之一人追疾既及宣孟向宣孟之面曰今
固是君耶請為君反死宣孟曰子名為誰及是且對曰
何以名為臣是翳桑下之餓人也遂闕而死宣孟得以
活此所謂德惠也故惠君子君子得其福惠小人小人
盡其力夫德一人活其身而況置惠於萬人乎故曰德

無細怨無小豈可無樹德而除怨務利於人哉利施者
福報怨往者禍來形於內者應於外不可不慎也此書
之所謂德無小者也詩云赳赳武夫公侯干城濟濟多
士文王以寧人君胡可不務愛士乎

孝景時吳楚反袁盎以太常使吳吳王欲使將不肯欲
殺之使一都尉以五百人圍守盎盎為吳相時從史與
盎侍兒私通盎知之不泄遇之如故人有告從史從史
懼亡歸盎自追遂以侍兒賄之復為從史及盎使吳見

圍守從史適為守盜校司馬夜引盜起曰君可以去矣
吳王期旦日斬君盜不信曰公何為者也司馬曰臣故
為君從使盜侍兒者也盜乃敬對曰公見親吾不足以
累公司馬曰君去臣亦且亡避吾親君何患乃以刀決
帳率徒卒道出令皆去盜遂歸報

智伯與趙襄子戰於晉陽下而死智伯之臣豫讓者怒
以其精氣能使襄子動心乃漆身變形吞炭更聲襄子
將出豫讓偽為死人處於梁下駟馬驚不進襄子動心

使使視梁下得豫讓襄子重其義不殺也又盜為抵罪
被刑人赭衣入繕宮裏子動心則曰必豫讓也裏子執
而問之曰子始事中行君智伯殺中行君子不能死還
反事之今吾殺智伯乃漆身為癘吞炭為啞欲殺寡人
何與先行異也豫讓曰中行君衆人畜臣臣亦衆人事
之智伯朝士待臣臣亦朝士為之用裏子曰非義也子
壯士也乃自置車庫中水漿毋入口者三日以禮豫讓
讓自知遂自殺也

晉遂樂盈之族命其家臣有敢從者死其臣曰辛俞從之吏得而將殺之君曰命汝無得從敢從何也辛俞對曰臣聞三世仕於家者君之二世者主之事君以死事主以勤為其賜之多也今臣三世於樂氏受其賜多矣臣敢畏死而忘三世之恩哉晉君釋之

留侯張良之大父開地相韓昭侯宣惠王襄哀王父平相釐王悼惠王悼惠王二十三年平卒二十歲秦滅韓良年少未官事韓韓破良家僮三百人弟死不葬良

悉以家財求刺客刺秦王為韓報仇以大父父五世相
韓國故遂學禮淮陽東見滄海君得力士為鐵椎重百
二十斤秦皇帝東遊良與客狙擊秦皇帝於博浪沙誤
中副車秦皇帝大怒大索天下求購甚急良更易姓名
深亡匿後卒隨漢報秦

鮑叔死管仲舉上衽而哭之泣下如雨從者曰非君父
子也此亦有說乎管仲曰非夫子所知也吾嘗與鮑子
負販於南陽吾三辱於市鮑子不以為怯知我之欲

有所明也鮑子嘗與我有所說王者而三不見聽鮑子
不以我為不肖知我之遇明君也鮑子嘗與我臨財
分貨吾自取多者三鮑叔不以我為貪知我之不足於
財也生我者父母知我者鮑子也士為知己者死而況
為之哀乎

晉趙盾舉韓厥晉君以為中軍尉趙盾死子朔嗣為卿
至景公三年趙朔為晉將朔取成公姊為夫人大夫屠
岸賈欲誅趙氏初趙盾在夢見叔帶持龜要而哭甚悲

已而笑拊手且歌盾卜之占兆絕而後好趙史援占曰
此甚惡非君之身及君之子然亦君之咎也至子趙朔世
益衰屠岸賈者始有寵於靈公及至於晉景公而賈為
司寇將作難乃治靈公之賊以致趙盾通告諸將曰趙
穿弑靈公盾雖不知猶為首賊臣殺君子孫在朝何以
懲罪請誅之韓厥曰靈公遇賊趙盾在外吾先君以為
無罪故不誅今諸君將誅其後是非先君之意而復妄
誅妄誅謂之亂臣有大事而君不聞是無君也屠岸賈

不聽厥告趙朔趨亡趙朔不肯曰子必不絕趙祀朔死
且不恨韓厥許諾稱疾不出賈不請而擅與諸將攻趙
氏於下宮殺趙朔趙括趙嬰齊皆滅其族朔妻成公姊
有遺腹走公宮匿後生男乳朔客程嬰持亡匿山中居
十五年晉景公疾卜之曰大業之後不遂者為祟景公
疾問韓厥韓厥知趙孤在乃曰大業之後在晉絕祀者
其趙氏乎夫自中行皆嬴姓也中行人面鳥喙降佐殷
帝大戊及周天子皆有明德下及幽厲無道而叔帶去

周適晉事先君文侯至于成公世有立功未嘗有絕祀
今及吾君獨滅趙宗國人哀之故見龜策唯君圖之
景公問云趙尚有後子孫乎韓厥具以實對於是景公
乃與韓厥謀立趙孤兒召而匿之宮中諸將入問疾景
公因韓厥之衆以脅諸將而見趙孤孤名曰武諸將不
得已乃曰昔下宮之難屠岸賈為之矯以君令并命羣
臣非然孰敢作難微君之疾羣臣固且請立趙後今君
有令羣臣之願也於是召趙武程嬰徧拜諸將軍將軍

遂返與程嬰趙武攻屠岸賈滅其族復與趙武田邑如故故人安可以無恩夫有恩於此攻復於彼非程嬰則趙孤不全非韓厥則趙後不復韓厥可謂不忘恩矣

北郭騷踵見晏子曰竊悅先生之義願乞所以養母者晏子使人分倉粟府金而遺之辭金而受粟有間晏子見疑於景公出奔北郭子召其友而告之曰吾悅晏子之義而嘗乞所以養母者吾聞之曰養及親者身更其難今晏子見疑吾將以身白之遂造公庭求復者曰晏

子天下之賢者也今去齊國齊國必侵矣方必見國之
侵也不若先死請絕頸以白晏子遂巡而退因自殺也
公聞之大駭乘馳而自追晏子及之國郊請而反之晏
子不得已而反之聞北郭子之以死白已也太息而歎
曰嬰不肖罪過固其所也而士以身明之哀哉

吳赤市使於智氏假道於衛甯文子具紵絺三百製將
以送之大夫豹曰吳雖大國也不壤交假之道則亦敬
矣又何禮焉甯文子不聽遂致之吳赤市至於智氏既

得事將歸吳知伯命造舟為梁吳赤市曰吾聞之天子
濟於水造舟為梁諸侯維舟為梁大夫方舟方舟臣之
職也且敬太甚必有故使人視之視則用兵在後矣將
以襲衛吳赤市曰衛假吾道而厚贈我我見難而不告
是與為謀也稱疾而留使人告衛衛人警戒智伯聞之
乃止

楚魏會於晉陽將以伐齊齊王患之使人召淳于髡曰
楚魏謀欲伐齊願先生與寡人共憂之淳于髡大笑而

不應王復問之又復大笑而不應三問而不應王怫然作色曰先生以寡人國為戲乎淳于髡對曰臣不敢以王國為戲也臣笑臣隣之祠田也以一盞飯與一鮒魚其祝曰下田沴邪得穀百車蟹堞者宜禾臣笑其所以祠者少而所求者多王曰善賜之千金革車百乘立為上卿

陽虎得罪於衛北見簡子曰自今以來不復樹人矣簡子曰何哉陽虎對曰夫堂上之人臣所樹者過半矣朝

廷之吏臣所立者亦過半矣邊境之士臣所立者亦過半矣今乃堂上之人親却臣於君朝廷之吏親危臣於衆邊境之士親劫臣於兵簡子曰唯賢者為能報恩不肖者不能夫樹桃李者夏得休息秋得食焉樹蒺藜者夏不得休息秋得其刺焉今子之所樹者蒺藜也自今以來擇人而樹毋已樹而擇之

魏文侯與田子方語有兩僮子衣青白衣而侍於君前子方曰此君之寵子乎文侯曰非也其父死於戰此其

幼孤也寡人收之子方曰臣以君之賊心為足矣今滋甚君之寵此子也又且以誰之父殺之乎文侯愍然曰寡人受令矣自是以後兵革不用

吳起為魏將攻中山軍人有病疽者吳子自吮其膿其母泣之旁人曰將軍於而子如是尚何為泣對曰吳子吮此子父之創而役之於注水之戰戰不旋踵而死今又吮之安知是子何戰而死是以哭之矣

東閭子嘗富貴而後乞人問之曰公何為如是曰吾自

知吾嘗相六七年未嘗薦一人也吾嘗富三千萬者再
未嘗富一人也不知士出身之咎然也孔子曰物之難
矣小大多少各有怨惡數之理也人而得之在於外假
之也

齊懿公之為公子也與邠歌之父爭田不勝及即位乃
掘而刑之而使歌為僕奪庸織之妻而使織為參乘公游
于申池二人浴于池歌以鞭扶織織怒歌曰人奪女妻
而不取怒一扶女庸何傷織曰孰與刑其父而不病奚

若乃謀殺公納之竹中

楚人獻鼃於鄭靈公公子家見公子宋之食指動謂公子家曰我如是必嘗異味及食大夫鼃召公子宋而不與公子宋怒染指於鼎嘗之而出公怒欲殺之公子宋與公子家謀先遂弑靈公子夏曰春秋者記君不君臣不臣父不父子不子者也此非一日之事也有漸以至焉

說苑卷六

欽定四庫全書

說苑卷七

漢 劉向 撰

政理

政有三品王者之政化之霸者之政威之彊者之政脅之夫此三者各有所施而化之為貴矣夫化之不變而後威之威之不變而後脅之脅之不變而後刑之夫至於刑者則非王者之所得已也是以聖王先德教而後

刑罰立榮恥而明防禁崇禮義之節以示之賤貨利之
弊以變之修道理內政振機之禮壹妃匹之際則莫不
慕義禮之榮而惡貪亂之恥其所由致之者化使然也
季孫問於孔子曰如殺無道以就有道何如孔子曰子
為政焉用殺子欲善而民善矣君子之德風也小人之
德草也草上之風必偃言明其化而已也治國有二機
刑德是也王者尚其德而希其刑霸者刑德並濟彊國
先其刑而後德夫刑德者化之所由興也德者養善而

進闕者也刑者懲惡而禁後者也故德化之崇者至於
賞刑罰之甚者至於誅夫誅賞者所以別賢不肖而列
有功與無功也故誅賞不可以繆誅賞繆則善惡亂矣
夫有功而不賞則善不勸有過而不誅則惡不懼善不
勸惡不懼而能以行化乎天下者未嘗聞也書曰畢協
賞罰此之謂也

水濁則魚困令苛則民亂城峭則必崩岸竦則必陲故
夫治國譬若張琴大絃急則小絃絕矣故曰急轡銜者

非千里御也有聲之聲不過百里無聲之聲延及四海故祿過其功者損名過其實者削情行合而民副之禍福不虛至矣詩云何其處也必有與也何其久也必有以也此之謂也

公叔文子為楚令尹三年民無敢入朝公叔子見曰嚴矣文子曰朝廷之嚴也寧云妨國家之治哉公叔子曰嚴則下暗下暗則上聾聾暗不能相通何國之治也蓋聞之也順針縷者成帷幕合升斗者實倉廩并小流而

成江海明主者有所受命而不行未嘗有所不受也

衛靈公謂孔子曰有語寡人為國家者謹之於廟堂之上而國家治矣其可乎孔子曰可愛人者則人愛之惡人者則人惡之知得之已者亦知得之人所謂不出於環堵之室而知天下者知反之已者也

子貢問治民於孔子孔子曰懔懔焉如以腐索御奔馬子貢曰何其畏也孔子曰夫通達之國皆人也以道導之則吾畜也不以道導之則吾讐也若何而毋畏

齊桓公謂管仲曰吾欲舉事於國昭然如日月無愚夫
愚婦皆曰善可乎仲曰可然非聖人之道桓公曰何也
對曰夫短綆不可以汲深井知鮮不可以與聖人之言
慧士可與辨物智士可與辨無方聖人可與辨神明夫
聖人之所為非衆人之所及也民知十已則尚與之爭
曰不如吾也百已則疵其過千已則唯而不信是故民
不可稍而掌也可并而牧也不可暴而殺也可麾而致
也衆不可戶說也可舉而示也

衛靈公問於史籀曰政孰為務對曰大理為務聽獄不
中死者不可生也斷者不可屬也故曰大理為務少馬
子路見公公以史籀言告之子路曰司馬為務兩國有
難兩軍相當司馬執枹以行之一關不當死者數萬以
殺人為非也此其為殺人亦衆矣故曰司馬為務少馬
子貢入見公以二子言告之子貢曰不識哉昔禹與有
扈氏戰三陳而不服禹於是脩教一年而有扈氏請服
故曰去民之所事奚獄之所聽兵革之不陳奚鼓之所

鳴故曰教為務也

齊桓公出獵逐鹿而走入山谷之中見一老公而問之
曰是為何谷對曰為愚公之谷桓公曰何故對曰以臣
名之桓公曰今視公之儀狀非愚人也何為以公名對
曰臣請陳之臣故畜牝牛生子而大賣之而買駒少年
曰牛不能生馬遂持駒去傍隣聞之以臣為愚故名此
谷為愚公之谷桓公曰公誠愚矣夫何為而與之桓公
遂歸明日朝以告管仲管仲正衿再拜曰此夷吾之愚

也使堯在上咎繇為理安有取人之駒者乎若有見暴如是叟者又必不與也公知獄訟之不正故與之耳請退而脩政孔子曰弟子記之桓公霸君也管仲賢佐也猶有以智為愚者也況不及桓公管仲者也

魯有父子訟者康子曰殺之孔子曰未可殺也夫民不知子父訟之不善者久矣是則上過也上有道是人亡矣康子曰夫治民以孝為本今殺一人以戮不孝不亦可乎孔子曰不孝而誅之是虐殺不辜也三軍大敗不

可誅也獄訟不治不可刑也上陳之教而先服之則百姓從風矣躬行不從而後俟之以刑則民知罪矣夫一仞之牆民不能踰百仞之山童子升而遊焉陵遲故也今是仁義之陵遲久矣能謂民弗踰乎詩曰俾民不迷昔者君子導其百姓不使迷是以威厲而不至刑錯而不用也於是訟者聞之乃請無訟

魯哀公問政於孔子對曰政有使民富且壽哀公曰何謂也孔子曰薄賦斂則民富無事則遠罪遠罪則民壽

公曰若是則寡人貧矣孔子曰詩云凱悌君子民之父母未見其子富而父母貧者也

文王問於呂望曰為天下若何對曰王國富民霸國富士僅存之國富大夫亡道之國富倉府是謂上溢而下漏文王曰善對曰宿善不祥是日也發其倉府以振鰥寡孤獨

武王問於太公曰治國之道若何太公對曰治國之道愛民而已曰愛民若何曰利之而勿害成之勿敗生之

勿殺與之勿奪樂之勿苦喜之勿怒此治國之道使民之誼也愛之而已矣民失其所務則害之也農失其時則敗之也有罪者重其罰則殺之也重賦斂者則奪之也多徭役以罷民力則苦之也勞而擾之則怒之也故善為國者遇民如父母之愛子兄之愛弟聞其飢寒為之哀見其勞苦為之悲

武王問於太公曰賢君治國何如對曰賢君之治國其政平其吏不苛其賦斂節其自奉薄不以私善害公法

賞賜不加於無功刑罰不施於無罪不因喜以賞不因怒以誅害民者有罪進賢舉過者有賞後宮不荒女謁不聽上無姪慝下不陰害不華宮室以費財不多觀游臺池以罷民不彫文刻鏤以逞耳目官無腐蠹之藏國無流餓之民此賢君之治國也武王曰善哉

武王問於太公曰為國而數更法令者何也太公曰為國而數更法令者不法法以其所善為法者也故令出而亂亂則更為法是以其法令數更也

成王問政於尹逸曰吾何德之行而民親其上對曰使之以時而敬順之忠而愛之布令信而不食言王曰其度安至對曰如臨深淵如履薄冰王曰懼哉對曰天地之間四海之內善之則畜也不善則讐也夏殷之臣反讐桀紂而臣湯武風沙之民自攻其主而歸神農氏此君之所明知也若何其無懼也

仲尼見梁君梁君問仲尼曰吾欲長有國吾欲列都之得吾欲使民安不惑吾欲使士竭其力吾欲使日月當

時吾欲使聖人自來吾欲使官府治為之奈何仲尼對
曰千乘之君萬乘之主問於丘者多矣未嘗有如主君
問丘之術也然而盡可得也丘聞之兩君相親則長有
國君惠臣忠則列都之得毋殺不辜毋釋罪人則民不
惑益士祿賞則竭其力尊天敬鬼則日月當時善為刑
罰則聖人自來尚賢使能則官府治梁君曰豈有不然
哉

子貢曰葉公問政於夫子夫子曰政在附近而來遠魯

哀公問政於夫子夫子曰政在於諭臣齊景公問政於夫子夫子曰政在於節用三君問政於夫子夫子應之不同然則政有異乎孔子曰夫荆之地廣而都狹民有離志焉故曰在於附近而來遠哀公有臣三人內比周公以惑其君外障距諸侯賓客以蔽其明故曰政在諭臣齊景公奢於臺榭淫於苑囿五官之樂不解一旦而賜人百乘之家者三故曰政在於節用此三者政也詩不云乎亂離斯瘼爰其適歸此傷離散以為亂者也匪

其止共惟王之邛此傷姦臣蔽主以為亂者也相亂蔑
資魯莫惠我師此傷奢侈不節以為亂者也察此三者
之所欲政其同乎哉

公儀休相魯魯君死左右請閉門公儀休曰止池淵吾
不稅蒙山吾不賦苛令吾不布吾已閉心矣何閉於門
哉

子產相鄭簡公謂子產曰內政毋出外政毋入夫衣裘
之不美車馬之不飾子女之不潔寡人之醜也國家之

不治封疆之不正夫子之醜也子產相鄭終簡公之身
內無國中之亂外無諸侯之患也子產之從政也擇能
而使之馮簡子善斷事子太叔善決而文公孫揮知四
國之為而辨於其大夫之族姓班位能否又善為辭令
裨謀善謀於野則獲於邑則否有事乃載裨謀與之適
野使謀可否而告馮簡子斷之使公孫揮為之辭令成
乃受子太叔行之以應對賓客是以鮮有敗事也

董安于治晉陽問政於蹇老蹇老曰曰忠曰信曰敢董

安子曰安忠乎曰忠於主曰安信乎曰信於令曰安敢乎曰敢於不善人董安子曰此三者足矣

魏文侯使西門豹往治於鄴告之曰必全功成名布義豹曰敢問全功成名布義為之柰何文侯曰子往矣是無邑不有賢豪辯博者也無邑不有好揚人之惡蔽人之善者也往必問豪俊者因而親之其辯博者因而師之問其好揚人之惡蔽人之善者因而察之不可以特聞從事夫耳聞之不如目見之目見之不如足踐之足

踐之不如手辦之人始入官如入晦室久而愈明明乃
治治乃行

宓子賤治單父彈鳴琴身不下堂而單父治巫馬期亦
治單父以星出以星入日夜不處以身親之而單父亦
治巫馬期問其故於宓子賤宓子賤曰我之謂任人子
之謂任力任力者固勞任人者固佚人曰宓子賤則君
子矣佚四肢全耳目平心氣而百官治任其數而已矣
巫馬期則不然弊性事情勞煩教詔雖治猶未至也

孔子謂宓子賤曰子治單父而衆說語丘所以爲之者
曰不齊父其父子其子恤諸孤而哀喪紀孔子曰善小
節也小民附矣猶未足也曰不齊之所父事者三人所
兄事者五人所友者十一人孔子曰父事三人可以教
孝矣兄事五人可以教弟矣友十一人可以教學矣中
節也中民附矣猶未足也曰此地民有賢於不齊者五
人不齊事之皆教不齊所以治之術孔子曰欲其大者
乃於此在矣昔者堯舜清微其身以聽觀天下務求賢

人夫舉賢者百福之宗也而神明之主也不齊之所治者小也不齊所治者大其與堯舜繼矣

宓子賤為單父宰辭於夫子夫子曰毋迎而距也毋望而許也許之則失守距之則閉塞譬如高山深淵仰之不可極度之不可測也子賤曰善敢不承命乎宓子賤為單父宰過於陽晝曰子亦有以送僕乎陽晝曰吾少也賤不知治民之術有釣道二焉請以送子子賤曰釣道柰何陽晝曰夫扱綸錯餌迎而吸之者陽橋也其為

魚薄而不美若存若亡若食若不食者魴也其為魚也博而厚味宓子賤曰善於是未至單父冠蓋迎之者交接於道子賤曰車驅之車驅之夫陽晝之所謂陽橋者至矣於是至單父請其耆老尊賢者而與之共治單父孔子弟子有孔蔑者與宓子賤皆仕孔子往過孔蔑問之曰自子之仕者何得何亡孔蔑曰自吾仕者未有所得而有所亡者三曰王事若襲學焉得習以是學不得明也所亡者一也奉祿少常需不足及親戚親戚益疏

矣所亡者二也公事多急不得弔死視病是以朋友益
疏矣所亡者三也孔子不說而復往見子賤曰自子之
仕何得何亡子賤曰自吾之仕未有所亡而所得者三
始誦之文今履而行之是學日益明也所得者一也奉
祿雖少常需得及親戚是以親戚益親也所得者二也
公事雖急夜勤弔死視病是以朋友益親也所得者三
也孔子謂子賤曰君子哉若人君子哉若人魯無君子
者斯焉取斯

晏子治東阿三年景公召而數之曰吾以子為可而使
子治東阿今子治而亂子退而自察也寡人將加大誅
於子晏子對曰臣請改道易行而治東阿三年不治臣
請死之景公許之於是明年上計景公迎而賀之曰甚
善矣子之治東阿也晏子對曰前臣之治東阿也屬託
不行貨賂不至陂池之魚以利貧民當此之時民無饑
者而君反以罪臣今臣之後治東阿也屬託行貨賂至
并會賦斂倉庫少內便事左右陂池之魚入於權家當

此之時饑者過半矣君乃反迎而賀臣愚不能復治東阿願乞骸骨避賢者之路再拜便辟景公乃下席而謝之曰子彊復治東阿東阿者子之東阿也寡人無復與焉

子路治蒲見於孔子曰由願受教孔子曰蒲多壯士又難治也然吾語汝恭以敬可以攝勇寬以正可以容衆恭以潔可以親上

子貢為信陽令辭孔子而行孔子曰力之順之因子之

時無奪無伐無暴無盜子貢曰賜少日事君子君子固有盜者邪孔子曰夫以不肖伐賢是謂奪也以賢伐不肖是謂伐也緩其令急其誅是謂暴也取人善以自為己是謂盜也君子之盜豈必當財幣乎吾聞之曰知為吏者奉法利民不知為吏者枉法以侵民此皆怨之所由生也臨官莫如平臨財莫如廉廉平之守不可攻也匿人之善者是謂蔽賢也揚人之惡者是謂小人也內相教而外相謗者是謂不足親也言人之善者有所

得而無所傷也言人之惡者無所得而有所傷也故君子慎言語矣毋先已而後人擇言出之令口如耳

楊朱見梁王言治天下如運諸掌然梁王曰先生有一妻一妾不能治三畝之園不能芸言治天下如運諸手掌何以楊朱曰臣有之君不見夫羊乎百羊而羣使五尺童子荷杖而隨之欲東而東欲西而西君且使堯牽一羊舜荷杖而隨之則亂之始也臣聞之夫吞舟之魚不遊淵鴻鵠高飛不就汙池何則其志極遠也黃鍾大

呂不可從繁奏之舞何則其音疏也將治大者不治小成大功者不小苛此之謂也

景差相鄭鄭人有冬涉水者出而脛寒後景差過之下陪乘而載之覆以上衽晉叔向聞之曰景子為人國相豈不固哉吾聞良吏居之三月而溝渠修十月而津梁成六畜且不濡足而況人手

魏文侯問李克曰為國如何對曰臣聞為國之道食有勞而祿有功使有能而賞必行罰必當文侯曰吾賞罰

皆當而民不與何也對曰國其有淫民乎臣聞之曰奪
淫民之祿以來四方之士其父有功而祿其子無功而
食之出則乘車馬衣美裘以為榮華入則脩筭琴鐘石
之聲而安其子女之樂以亂鄉曲之教如此者奪其祿
以來四方之士此之謂奪淫民也

齊桓公問於管仲曰國何患管仲對曰患夫社鼠桓公
曰何謂也管仲對曰夫社束木而塗之鼠因往託焉燠
之則恐燒其木灌之則恐敗其塗此鼠所以不可得殺

者以社故也夫國亦有社鼠人主左右是也內則蔽善
惡於君上外則賣權重於百姓不誅之則為亂誅之則
為人主所容據腹而有之此亦國之社鼠也人有酤酒
者為器甚潔清置表甚長而酒酸不售問之里人其故
里人云公之狗猛人挈器而入且酤公酒狗迎而噬之
此酒所以酸不售之故也夫國亦有猛狗用事者也有
道術之士欲明萬乘之主而用事者迎而齧之此亦國
之猛狗也左右為社鼠用事者為猛狗則道術之士不

得用矣此治國之所患也

齊侯問於晏子曰為政何患對曰患善惡之不分公曰何以察之對曰審擇左右左右善則百僚各得其所宜而善惡分孔子聞之曰此言也信矣善言進則不善無由入矣不善言進則善無由入矣

復橐之君朝齊桓公問治民焉復橐之君不對而偃口操衿抑心桓公曰與民共甘苦饑寒乎夫以我為聖人也故不用言而諭因禮之千金晉文公時翟人有封狐

文豹之皮者文公喟然嘆曰封狐文豹何罪哉以其皮
為罪也大夫欒枝曰地廣而不平財聚而不散獨非狐
豹之罪乎文公曰善哉說也欒枝曰地廣而不平人將
平之財聚而不散人將爭之於是列地以分民散財以
賑貧

晉文侯問政於舅犯舅犯對曰分熟不如分腥分腥不
如分地割以分民而益其爵祿是以上得地而民知富
上失地而民知貧古之所謂致師而戰者其此之謂也

晉侯問於士文伯曰三月朔日有蝕之寡人學昏焉詩所謂彼日而蝕于何不臧者何也對曰不善政之謂也國無政不用善則自取譴於日月之災故不可不慎也政有三而已一曰因民二曰擇人三曰從時

延陵季子游於晉入其境曰嘻暴哉國乎入其都曰嘻力屈哉國乎立其朝曰嘻亂哉國乎從者曰夫子之入晉境未久也何其名之不疑也延陵季子曰然吾入其境田畝荒穢而不休雜增崇高吾是以知其國之暴也

吾入其都新室惡而故室美新墻卑而故墻高吾是以知其民力之屈也吾立其朝君能視而不下問其臣善伐而不上諫吾是以知其國之亂也齊之所以不如魯者太公之賢不如伯禽伯禽與太公俱受封而各之國三年太公來朝周公問曰何治之疾也對曰尊賢先疏後親先義後仁也此霸者之迹也周公曰太公之澤及五世五年伯禽來朝周公問曰何治之難對曰親親者先內後外先仁後義也此王者之迹也周公曰魯之澤

及十世故魯有王迹者仁厚也齊有霸迹者武政也齊之所以不如魯也太公之賢不如伯禽也

景公好婦人而丈夫飾者國人盡服之公使吏禁之曰女子而男子飾者裂其衣斷其帶裂衣斷帶相望而不止晏子見公曰寡人使吏禁女子而男子飾者裂其衣斷其帶相望而不止者何也對曰君之服之於內而禁之於外猶懸牛首於門而求買馬肉也公胡不使內勿服則外莫敢為也公曰善使內勿服不旋月而國莫之

服也

齊人甚好轂擊相犯以為樂禁之不止晏子患之乃為新車良馬出與人相犯也曰轂擊者不祥臣其祭祀不順居處不敬乎下車棄而去之然後國人乃不為故曰禁之以制而身不先行也民不肯止故化其心莫若教也


魯國之法魯人有贖臣妾於諸侯者取金於府子貢贖人於諸侯而還其金孔子聞之曰賜失之矣聖人之舉

事也可以移風易俗而教道可施於百姓非獨適其身之行也今魯國富者寡而貧者衆贖而受金則為不廉不受則後莫復贖自今以來魯人不復贖矣孔子可謂通於化矣故老子曰見小曰明

孔子見季康子康子未說孔子又見之宰予曰吾聞之夫子曰王公不聘不動今吾子之見司寇也少數矣孔子曰魯國以衆相陵以兵相暴之日久矣而有司不治聘我者孰大手於是魯人聞之曰聖人將治可以不先

自為刑罰乎自是之後國無爭者孔子謂弟子曰違山
十里螻蛄之聲猶尚存耳政事無如膺之矣古之魯俗
塗里之間羅門之羅牧門之漁獨得於禮是以孔子善
之夫塗里之間富家為貧者出羅門之羅有親者取多
無親者取少牧門之漁有親者取巨無親者取小

春秋曰四民均則王道興而百姓寧所謂四民者士農
工商也婚姻之道廢則男女之道悖而淫泆之路興矣



說苑卷七

欽定四庫全書

子部

說苑卷八至十

詳校官侍讀學士臣沈咸熙

編修臣程嘉謨覆勘

總校官檢討臣何思鈞

校對官編修臣繆晉

謄錄監生臣陸麟

欽定四庫全書

說苑卷八

尊賢

漢 劉向 撰

人君之欲平治天下而垂榮名者必尊賢而下士易曰
自上下下其道大光又曰以貴下賤大得民也夫明王
之施德而下下也將懷遠而致近也夫朝無賢人猶鴻
鵠之無羽翼也雖有千里之望猶不能致其意之所欲

至矣是故游江海者託於船致遠道者託於乘欲霸王者託於賢伊尹呂尚管夷吾百里奚此霸王之船乘也釋父兄與子孫非疏之也任庖人鈞屠與仇讐僕虜非阿之也持社稷立功名之道不得不然也猶大匠之為宮室也量小大而知材木矣比功校而知人數矣是故呂尚聘而天下知商將亡而周之王也管夷吾百里奚任而天下知齊秦之必霸也豈特船乘哉夫成王霸固有人亡國破家亦固有人桀用干辛紂用惡來宋用唐

鞅齊用蘇秦秦用趙高而天下知其亡也非其人而欲
有功譬其若夏至之日而欲夜之長也射魚指天而欲
發之當也雖舜禹猶亦困而又況乎俗主哉

春秋之時天子微弱諸侯力政皆叛不朝衆暴寡彊剗
弱南夷與北狄交侵中國之不絕若綫桓公於是用管
仲鮑叔隰朋賓胥無甯戚三存亡國一繼絕世救中國
攘戎狄卒脅荆蠻以尊周室霸諸侯晉文公用咎犯先
軫陽處父彊中國敗彊楚合諸侯朝天子以顯周室楚

莊王用孫叔敖司馬子反將軍子重征陳從鄭敗彊晉
無敵於天下秦穆公用百里子蹇叔子王子廖及由余
據有雍州攘敗西戎吳用延州來季子并冀州揚威于
雞父鄭僖公富有千乘之國貴為諸侯治義不順人心
而取弑於臣者不先得賢也至簡公用子產裨謚世叔
行人子羽賊臣除正臣進去彊楚合中國國家安寧二
十餘年無彊楚之患故虞有宮之奇晉獻公為之終夜
不寐楚有子玉得臣文公為之側席而坐遠乎賢者之

厭難折衝也夫宋襄公不用公子目夷之言大辱於楚
曹不用僖負羈之諫敗死於戎故共惟五始之要治亂
之端在乎審已而任賢也國家之任賢而吉任不肖而
凶案往世而視已事其必然也如合符此為人君者不
可以不慎也國家昏亂而良臣見魯國大亂季友之賢
見僖公即位而任季子魯國安寧外內無憂行政二十
一年季子之卒後邾擊其南齊伐其北魯不勝其患將
乞師於楚以取全耳

或作身

故傳曰患之起必自此始也

公子買不可使戍衛公子遂不聽君命而擅之晉內侵於臣下外困於兵亂弱之患也僖公之性非前二十一年常賢而後乃漸變為不肖也此季子存之所益亡之所損也夫得賢失賢其損益之驗如此而人主忽於所用甚可疾痛也夫智不足以見賢無可柰何矣若智能見之而彊不能決猶豫不用而大者死亡小者亂傾此甚可悲哀也以宋殤公不知孔父之賢乎安知孔父死已必死趨而救之趨而救之者是知其賢也以魯莊公

不知季子之賢乎安知疾將死召季子而授之國政授之國政者是知其賢也此二君知能見賢而皆不能用故宋殤公以殺死魯莊公以賊嗣使宋殤蚤任孔父魯莊素用季子乃將靖隣國而況自存乎

鄒子說梁王曰伊尹故有莘氏之媵臣也湯立以為三公天下之治太平管仲故成陰之狗盜也天下之庸夫也齊桓公得之為仲父百里奚道之於路傳賣五羊之皮秦穆公委之以政甯戚故將車人也叩轅行歌於康

之衢桓公任以國司馬喜顓脚於宋而宰相中山范雎
折脅拉齒於魏而後為應侯太公望故老婦之出夫也
朝歌之屠佐也棘津迎客之舍人也年七十而相周九
十而封齊故詩曰緜緜之葛在於曠野良工得之以為
絺紵良工不得枯死於野此七士者不遇明君聖主幾
行乞丐枯死於中野譬猶緜緜之葛矣

眉睫之微接而形於色聲音而風感而動乎心甯戚擊
牛角而商歌桓公聞而舉之鮑龍跪石而登嵯孔子為

之下車堯舜相見不違桑陰文王舉太公不以日久故
賢聖之接也不待久而親能者之相見也不待試而知
矣故士之接也非必與之臨財分貨乃知其廉也非必
與之犯難涉危乃知其勇也舉事決斷是以知其勇也
取與有讓是以知其廉也故見虎之尾而知其大於狸
也見象之牙而知其大於牛也一節見則百節知矣由
此觀之以所見可以占未發覩小節固足以知大體矣
禹以夏王桀以夏亡湯以殷王紂以殷亡閻廬以吳戰

勝無敵於天下而夫差以見禽於越文公以晉國霸而厲公以見弑於匠麗之宮威王以齊彊於天下而湣王以弑死於廟梁穆公以秦顯名尊號而二世以劫於望夷其所以君王者同而功迹不等者所任異也是故成王處襁褓而朝諸侯周公用事也趙武靈王年五十而餓死於沙丘任李充故也桓公得管仲九合諸侯一匡天下失管仲任豎刁易牙身死不葬為天下笑一人之身榮辱俱施焉在所任也故魏有公子無忌削地復得

趙任藺相如秦兵不敢出鄢陵任唐睢國獨立楚有
申包胥而昭王反位齊有田單襄王得國由此觀之國
無賢佐俊士而能以成功立名安危繼絕者未嘗有也
故國不務大而務得民心佐不務多而務得賢俊得民
心者民往之有賢佐者士歸之文王請除炮烙之刑而
殷民從湯去張網者之三面而夏民從越王不隳舊冢
而吳人服以其所為之順於民心也故聲同則處異而
相應德合則未見而相親賢者立於本朝則天下之豪

相率而趨之矣何以知其然也曰管仲桓公之賊也鮑叔以為賢於已而進之為相七十言而說乃聽遂使桓公除報讐之心而委國政焉桓公垂拱無事而朝諸侯鮑叔之力也管仲之所以能北走桓公無自危之心者同聲於鮑叔也紂殺王子比干箕子被髮而佯狂陳靈公殺泄冶而鄧元去陳自是之後殷兼於周陳亡於楚以其殺比干泄冶而失箕子與鄧元也燕昭王得郭隗而鄒衍樂毅以齊趙至蘇子屈景以周楚至於是舉兵

而攻齊棲閔王於莒燕校地計衆非與齊均也然所以能信意至於此者由得士也故無常安之國無恒治之民得賢者則安昌失之者則危亡自古及今未有不然者也明鏡所以照形也往古所以知今也夫知惡往古之所以危亡而不務襲迹於其所以安昌則未有異乎却走而求逮前人也太公知之故舉微子之後而封比干之墓夫聖人之於死尚如是其厚也況當世而生存者乎則其弗失可識矣

齊景公問於孔子曰秦穆公其國小處僻而霸何也對
曰其國小而志大雖處僻而其政中其舉果其謀和其
令不偷親舉五羖大夫於係縲之中與之語三日而授
之政以此取之雖王可也霸則小矣

或曰將謂桓公仁義乎殺兄而立非仁義也將謂桓公
恭儉乎與婦人同輿馳於邑中非恭儉也將謂桓公清
潔乎閨門之內無可嫁者非清潔也此三者亡國失君
之行也然而桓公兼有之以得管仲隰朋九合諸侯一

匡天下畢朝周室為五霸長以其得賢佐也失管仲隰
朋任豎刁易牙身死不葬蟲流出戶一人之身榮辱俱
施者何者其所任異也由此觀之則任佐急矣周公旦
白屋之士所下者七十人而天下之士皆至晏子所與
同衣食者百人而天下之士亦至仲尼脩道行理文章
而天下之士亦至矣伯牙子鼓琴鍾子期聽之方鼓而
志在太山鍾子期曰善哉乎鼓琴巍巍乎若太山少選
之間而志在流水鍾子期復曰善哉乎鼓琴湯湯乎若

流水鍾子期死伯牙破琴絕絃終身不復鼓琴以爲世
無足爲鼓琴者非獨鼓琴若此也賢者亦然雖有賢者
而無以接之賢者奚由盡忠哉驥不自至千里者待伯
樂而後至也

周威公問於甯子曰取士有道乎對曰有窮者達之亡
者存之廢者起之四方之士則四面而至矣窮者不達
亡者不存廢者不起四方之士則四面而畔矣夫城固
不能自守兵利不能自保得士而失之必有其間夫士

存則君尊士亡則君卑周威公曰士壹至如此乎對曰
君不聞夫楚平王有士曰楚侯胥丘負客王將殺之出
亡之晉晉人用之是為城濮之戰又有士曰苗贄皇王
將殺之出亡走晉晉人用之是為鄢陵之戰又有士曰
解子王將殺之出亡走晉晉人用之是為兩堂之戰
又有士曰伍子胥王殺其父兄出亡走吳閭閻用之於
是興師而襲郢故楚之大得罪於梁鄭宋衛之君猶未
遽至於此也此四得罪於其士三暴其民骨一亡其國

由是觀之士存則國存士亡則國亡子胥怒而亡之申
包胥怒而存之士胡可無貴乎

哀公問於孔子曰人何若而可取也孔子對曰毋取拙
者無取健者毋取口銳者哀公曰何謂也孔子曰拙者
大給利不可盡用健者必欲兼人不可以為法也口銳
者多誕而寡信後恐不驗也夫弓矢和調而後求其中
焉馬慤愿順然後求其良材焉人必忠信重厚然後求
其知能焉今人有不忠信厚重而多知能如此人者譬

猶豺狼與不可以身近也是故先其仁信之誠者然後親之於是有知能者然後任之故曰親仁而能使能夫取人之術也觀其言而察其行夫言者所以抒其胸而發其情者也能行之士必能言之是故先觀其言而揆其行夫以言揆其行雖有姦軌之人無以逃其情矣哀公曰善

周公攝天子位七年布衣之士執贄所師見者十二人窮巷白屋所先見者四十九人時進善者百人教士者

千人官朝者萬人當此之時誠使周公驕而且愾則天下賢士至者寡矣苟有至者則必貪而尸祿者也尸祿之臣不能存君矣

齊桓公設庭燎為士之欲造見者期年而士不至於是東野鄙人有以九九之術見者桓公曰九九何足以見乎鄙人對曰臣非以九九為足以見也臣聞主君設庭燎以待士期年而士不至夫士之所以不至者君天下賢君也四方之士皆自以論而不及君故不至也夫九

九薄能耳而君猶禮之况賢於九九乎夫太山不辭壤
石江海不逆小流所以成大也詩云先民有言詢於蕝
蕝言博謀也桓公曰善乃因禮之期月四方之士相攜
而並至詩曰自堂徂基自羊徂牛言以內及外以小及
大也

齊景公伐宋至於岐隄之上登高以望太息而歎曰昔
我先君桓公長轂八百乘以霸諸侯今我長轂三千乘
而不敢久處於此者豈其無管仲歟弦章對曰臣聞之

水廣則魚大君明則臣忠昔有桓公故有管仲今桓公在此則車下之臣盡管仲也

趙簡子游於河而樂之歎曰安得賢士而與處焉舟人古乘跪而對曰夫珠玉無足去此數千里而所以能來者人好之也今士有足而不來者此是吾君不好之乎趙簡子曰吾門左右客千人朝食不足暮收市征暮食不足朝收市征吾尚可謂不好士乎舟人古乘對曰鴻鵠高飛遠翔其所恃者六翮也背上之毛腹下之毳無

尺寸之數去之滿把飛不能為之益卑益之滿把飛不能為之益高不知門下左右客千人者有六翮之用乎將盡毛毳也

齊宣王坐淳于髡侍宣王曰先生論寡人何好淳于髡曰古者所好四而王所好三焉宣王曰古者所好何與寡人所好淳于髡曰古者好馬王亦好馬古者好味王亦好味古者好色王亦好色古者好士王獨不好士宣王曰國無士耳有則寡人亦說之矣淳于髡曰古者驩

駟騏驎今無有王選於衆王好馬矣古者有豹象之胎
今無有王選於衆王好味矣古者有毛騫西施今無有
王選於衆王好色矣王必將待堯舜禹湯之士而後好
之則禹湯之士亦不好王矣宣王嘿然無以應

衛君問於田讓曰寡人封侯盡千里之地賞賜盡御府
繒帛而士不至何也田讓對曰君之賞賜不可以功及
也君之誅罰不可以理避也猶舉杖而呼狗張弓而祝
雞矣雖有香餌而不能致者害之必也

宗衛相齊遇逐罷歸舍召門尉田饒等二十有七人而問焉曰士大夫誰能與我赴諸侯者乎田饒等皆伏而不對宗衛曰何士大夫之易得而難用也饒對曰非士大夫之難用也是君不能用也宗衛曰不能用士大夫何若田饒對曰厨中有臭肉則門下無死士今夫三升之糴不足於士而君鴈鶩有餘粟紈素綺繡靡麗堂楯從風雨弊而士曾不得以緣衣果園梨栗後宮婦人撫以相撓而士曾不得一嘗且夫財者君之所輕也死者

士之所重也君不能用所輕之財而欲使士致所重之死豈不難乎哉於是宗衛面有慚色逡巡避席而謝曰此衛之過也

魯哀公問於孔子曰當今之時君子誰賢對曰衛靈公公曰吾聞之其閨門之內姑姊妹無別對曰臣觀於朝廷未觀於堂陛之間也靈公之弟曰公子渠牟其知足以治千乘之國其信足以守之而靈公愛之又有士曰王林國有賢人必進而任之無不達也不能達退而與

分其祿而靈公尊之又有士曰慶足國有大事則進而治之無不濟也而靈公說之史鰌去衛靈公邸舍三月琴瑟不御待史鰌之入也而後入臣是以知其賢也介子推行年十五而相荆仲尼聞之使人往視還曰廊下有二十五俊士堂上有二十五老人仲尼曰合二十五人之智智於湯武并二十五人之力力於彭祖以治天下其固免矣乎

孔子閒居喟然而嘆曰銅鞮伯華而無死天下其有定

矣子路曰願聞其為人也何若孔子曰其幼也敏而好學其壯也有勇而不屈其老也有道而能以下人子路曰其幼也敏而好學則可其壯也有勇而不屈則可夫有道又誰下哉孔子曰由不知也吾聞之以衆攻寡而無不消也以貴下賤無不得也昔在周公旦制天下之政而下士七十人豈無道哉欲得士之故也夫有道而能下於天下之士君子乎哉

魏文侯從中山奔命安邑田子方從太子擊過之下車

而趨子方坐乘如故告太子曰為我請君待我朝謁太子不說因謂子方曰不識貧窮者驕人富貴者驕人乎子方曰貧窮者驕人富貴者安敢驕人人主驕人而亡其國吾未見以國待亡者也大夫驕人而亡其家吾未見以家待亡者也貧窮者若不得意納履而去安往不得貧窮乎貧窮者驕人富貴者安敢驕人太子及文侯道田子方之語文侯嘆曰微吾子之故吾安得聞賢人之言吾下子方以行得而友之自吾友子方也君臣益

親百姓益附吾是以得友士之功我欲伐中山吾以武
下樂羊三年而中山為獻於我我得以得有武之功吾
所以不少進於此者吾未見以智驕我者也若得以智
驕我者豈不及古之人乎

晉文侯行地登隧大夫皆扶之隨會不扶文侯曰會夫
為人臣而忍其君者其罪奚如對曰其罪重死文侯曰
何謂重死對曰身死妻子為戮焉隨會曰君奚獨問為
人臣忍其君者而不問為人君而忍其臣者耶文侯曰

為人君而忍其臣者其罪何如隨會對曰為人君而忍其臣者智士不為謀辯士不為言仁士不為行勇士不為死文侯援綏下車辭大夫曰寡人有腰髀之病願諸大夫勿罪也

齊將軍田疇出將張生郊送曰昔者堯讓許由以天下洗耳而不受將軍知之乎曰唯然知之伯夷叔齊辭諸侯之位而不為將軍知之乎曰唯然知之於陵仲子辭三公之位而傭為人灌園將軍知之乎曰唯然知之智

過去君弟變姓名免為庶人將軍知之乎曰唯然知之
孫叔敖三去相而不悔將軍知之乎曰唯然知之此五
大夫者名辭之而實羞之今將軍方吞一國之權提鼓
擁旗被堅執銳旋回十萬之師擅斧鉞之誅慎毋以士
之所羞者驕士田疇曰今日諸君皆為疇祖道具酒脯
而先生獨教之以聖人之道謹聞命矣

魏文侯見段干木立倦而不敢息及見翟黃踞堂而與
之言翟黃不說文侯曰段干木官之則不肯祿之則不

受今汝欲官則相至欲祿則上卿既受吾賞又責吾禮
母乃難乎

孔子之郕遭程子於塗傾蓋而語終日有間顧子路曰
取束帛一以贈先生子路不對有間又顧曰取束帛一
以贈先生子路屑然對曰由聞之也士不中而見女無
媒而嫁君子不行也孔子曰由詩不云乎野有蔓草零
露漙兮有美一人清揚婉兮邂逅相遇適我願兮今程
子天下之賢士也於是不贈終身不見大德毋踰閑小

德出入可也

齊桓公使管仲治國管仲對曰賤不能臨貴桓公以為上卿而國不治桓公曰何故管仲對曰貧不能使富桓公賜之齊國市租一年而國不治桓公曰何故對曰疏不能制親桓公立以為仲父齊國大安而遂霸天下孔子曰管仲之賢不得此三權者亦不能使其君南面而霸矣

桓公問於管仲曰吾欲使爵腐於酒肉腐於俎得無害

於霸乎管仲對曰此極非其貴者耳然亦無害於霸也桓公曰何如而害霸管仲對曰不知賢害霸知而不用害霸用而不任害霸任而不信害霸信而復使小人參之害霸桓公曰善

魯人攻鄆魯子辭於鄆君曰請出寇罷而後復來請姑毋使狗豕入吾舍鄆君曰寡人之於先生也人無不聞今魯人攻我而先生去我我胡守先生之舍魯人果攻鄆而數之罪十而魯子之所爭者九魯師罷鄆君復修

曾子舍而後迎之

宋司城子罕之貴子韋也入與共食出與同衣司城子罕亡子韋不從子罕來復召子韋而貴之左右曰君之善子韋也君亡不從來又復貴之君獨不愧於君之忠臣乎子罕曰吾唯不能用子韋故至於亡今吾之得復也尚是子韋之遺德餘教也吾故貴之且我之亡也吾臣之削迹拔樹以從我者奚益於吾亡哉

楊因見趙簡主曰臣居鄉三逐事君五去聞君好士故

走來見簡主聞之絕食而歎跽而行左右進諫曰居鄉
三逐是不容衆也事君五去是不忠上也今君有士見
過八矣簡主曰子不知也夫美女者醜婦之仇也盛德
之士亂世所疏也正直之行邪枉所憎也遂出見之因
授以為相而國大治由是觀之遠近之人不可以不察
也

應侯與賈午子坐聞其鼓琴之聲應侯曰今日之琴一
何悲也賈午子曰夫張急調下故使人悲耳急張者良

材也調下者官卑也取夫良材而卑官之安能無悲乎
應侯曰善哉

十三年諸侯舉兵以伐齊齊王聞之惕然而恐召其羣
臣大夫告曰有智為寡人用之於是博士淳于髡仰天
大笑而不應王復問之又大笑不應三笑不應王艷然
作色不悅曰先生以寡人語為戲乎對曰臣非敢以大
王語為戲也臣笑臣隣之祠田也以一盞飯一壺酒三
鮒魚祝曰蟹螯者宜禾滂邪者百車傳之後世洋洋有

餘臣笑其賜鬼薄而請之厚也於是王乃立淳于髡為上卿賜之千金革車百乘與平諸侯之事諸侯聞之立罷其兵休其士卒遂不敢攻齊此非淳于髡之力乎

田忌去齊奔楚楚王郊迎至舍問曰楚萬乘之國也齊亦萬乘之國也常欲相并為之奈何對曰易知耳齊使申孺將則楚發五萬人使上將軍將之至禽將軍首而反耳齊使田居將則楚發二十萬人使上將軍將之分別而相去也齊使眅子將楚發四封之內王自出將而

忌從相國上將軍為左右司馬如是則王僅得存耳於是齊使申孺將楚發五萬人使上將軍至擒將軍首反於是齊王忿然乃更使眊子將楚悉發四封之內王自出將田忌從相國上將軍為左右司馬蓋王車屬九乘僅得免耳至舍王北面正領齊祛問曰先生何知之早也田忌曰申孺為人侮賢者而輕不肖者賢不肖者俱不為用是以亡也田居為人尊賢者而賤不肖者賢者負任不肖者退是以分別而相去也眊子之為人也尊

賢者而愛不肖者賢不肖俱負任是以王僅得存耳

魏文侯觴大夫於曲陽飲酣文侯喟然嘆曰吾獨無豫讓以為臣蹇重舉酒進曰臣請浮君文侯曰何以對曰臣聞之有命之父母不知孝子有道之君不知忠臣夫豫讓之君亦何如哉文侯曰善受浮而飲之嚼而不讓曰無管仲鮑叔以為臣故有豫讓之功也

趙簡子曰吾欲得范中行氏良臣史鰌曰安用之簡子曰良臣人所願也又何問焉曰君以為無良臣故也夫

事君者諫過而薦可章善而替否獻能而進賢朝夕誦
善敗而納之聽則進否則退今范中行氏之良臣也不
能匡相其君使至於難出在於外又不能入亡而棄之
何良之為若不棄君安得之夫良將營其君使復其位
死而後止何日以來若未能乃非良也簡子曰善

子路問於孔子曰治國何如孔子曰在於尊賢而賤不
肖子路曰范中行氏尊賢而賤不肖其亡何也曰范中
行氏尊賢而不能用也賤不肖而不能去也賢者知其

不已用而怨之不肖者知其賤已而讐之賢者怨之不肖者讐之怨讐並前中行氏雖欲無亡得乎

晉荆戰於邲晉師敗績荀林父將歸請死昭公將許之士貞伯曰不可城濮之役晉勝於荆文公猶有憂色曰子玉猶存憂未歇也困獸猶鬪况國相乎及荆殺子玉乃喜曰莫予毒也今天或者大警晉也林父之事君君進思盡忠退思補過社稷之衛也今殺之是重荆勝也昭公曰善乃使復將

說苑卷八